

PLÊF DI S. MARTIN VESCUL  
RUALP E VAL  
33022 CJARGNE

Sâr Pressident,

seben ch'ò sconbat di agnoruns pe nestre culture, cumò che il caroçon uficiâl al passe pal gno Cumun, no ai piç voe di viodi nè di sintî ce ch'ò faseis. O vin ideis masse difarentis. Per vuâtris culture no jè pulitiche; par me, la prime sielte per fâ culture e jè chê pulitiche. No mi contenti di vuessam o di corletis; o vuei che la me int a vivi e a fâsi flurî ancjemò l'arbul de culture furlane.

O soi restât viodimi a rivâ l'invît pe Messe di Dinplan. O vevin resonât in merit te cunvigne di predis de nestre foranie, stant che i miei celegas a vevin vude duc' la letare. A mi mi è rivada 20 dîs dopo, ma ce che ur ài dit a lôr, j al dîs anje a lui; cence nissun rusin o asse.

O dîs Messe par furlan ogni domenie; o soteri la me int, o batîi i miei fruz, o compagni i nuviçârs dai miei zovins simpri, cul sâvor de nestre tiere. Par me la Messe per furlan e jè cuistion di vite pastorâl, di vite. Pai predis ch'a saran a fâ la mascarade atôr dal altâr cun vuâtris, invessit, e jè simpri stade, pulitiche, propagande, disubidiense, scandul, eresie e ce. E difat nè che le àn mai dite nè che le àn lassade dî. Mi semèe di viodiju a fâ provis par preâ te lenghe de lôr int! Seont lui, varessio cumò di riscjâ une robe tant serie (cetant plui serie des vuestris cunvignis e dai libris plens di pipins e salâts di prêsit ch'ò butais fûr) cun tune int e cun tun scjap di predis che no àn mai sintût il problema nè la voe di frontâlu, tacant dal pleven di Dimplan?

O ài gust che lôr a vegnin: un folclôr al vâl chelâtri e, pe vuestre sossie, il folclôr al è di fonde. Per me al sares un sacrilegio e la domenie dopo ne mi sintares di cjalâ in muse la me int che vîf chê culture, a pefarensse di vuâtris, ch'ò viveis pàrie ma che dentrivie le sbeleais e le sassinais. O amancul no fasseis un colp par ch'a vivi.

Cu la fede che lui mi capissi e ch'al seti plui grant e cussient de societât o conclave ch'al è pressident, lu saludi e j auguri ogni ben.

Rualp, ai 20 di setembar dal 1981

(pre Antoni Beline, plevan)